

Dumondas d'asil èn savens delicatas

Mesiras per accelerar la procedura

DA LUCAS DEPLAZES / ANR

■ (anr/ld) L'ultim temp han divers cas en connex cun requirents d'asil chaschunà difficultads e provocà critica da diversas varts. Las partidas politicas han reclamà ch'ellas n'hajan betg gi chaschun da prender posiziun davart midadas da la lescha d'asil. Venderdi passà ha infurmà *Simonetta Sommaruga* a Berna las medias davart la situaziun e las midadas prendidas en egl. Ella sa fatschentia gugent cun las dumondas d'asil, quellas stettian ad ella a cor, ha ella sincerà davant la pressa. Gia sco commembra da l'executiva da *Köniz* saja ella stada confruntada cun problems d'asil sin il stgalim communal. *Sommaruga* ha er visità divers centers d'accogliment d'asil e discurrì cun ils responsabels a la front. Ella n'è beg cuntenta cun ils lungs termins da decisiun. Perquai vul ella uss agir e procurar per ina procedura pli efficazia.

En l'avegnir vul tractar *Sommaruga* la gronda part da las singulas dumondas d'asil gia en ils centers d'accogliment e

desister d'als repartir sin ils chantuns uschè lunsch sco pussaivel. Quai prenda dentant dapli centers d'asil per la confederaziun. Lezza è responsabla per la politica d'asil. La confederaziun na dispona dentant betg da las localitads necessarias ed adattadas per dar domicil a requirents d'asil. Ella è dependenta dals chantuns e da las vischnancas. Il cumportament da singuls asilants da l'ultim temp ha dentant provocà reacziuns negativas tar la populaziun che fa uss dapli resistenza cunter centers per requirents d'asil, ha deplorà *Sommaruga*.

En l'avegnir duai ina emprima giudicaziun davart la dumonda d'asil vegnir tractata en ils centers d'accogliment. Quai lubess da tractar pli svelt ina part da las dumondas d'asil e da desister d'ina repartiziun sin ils chantuns. Tenor *Sommaruga* duai er vegnir examinada la situaziun sanitar da las persunas che vulan asil gia als cunfins. Ella vul era meglierar tscherts dretgs per ils requirents d'asil ed als accordar il dretg sin assistenza giuridica gratuita. *Sommaruga* vul er ina meglra coordinaziun cun il Tribunal administrativ federal. Cun

quellas mesiras duai la procedura administrativa vegnir reducida ed accelerada. Quai lubess plinavant d'integrar pli svelt las persunas cun dretg d'asil.



Simonetta Sommaruga vul accelerar la procedura da dar asil. FOTO L. DEPLAZES

Repatriaziun difficila

In problem fetg difficil e savens crititgà è la moda e maniera da repatriaziun d'asilants che fan resistenza cunter lur cumond d'expulsiun. Cumbain ch'i sa tractia da cas singuls provotgeschan talas persunas renitentis critica da diversas varts. Ins stoppia ina giada sa metter en la situaziun dals responsabels per la repatriaziun, ha fatg attent *Sommaruga*. La lavur dals organs d'execuziun pretenda chapientscha e sensibilitad e deplorablmain magari ina gronda preschientscha da la polizia. Mintga cas dovri ina ponderaziun difficila quant lunsch ch'ins astga ir. *Sommaruga* ha punctuà ch'il stadi costituziunal stoppia – sco ultima ratio – far valair las leschas per tuts e quai consequentmain senza remischun, uschiglio perdia el la credibladad. *Sommaruga* ha era defendì l'accord da Dublin che funcziuneschia

detg bain er cun l'Italia. Dentant era questa cunvegna cuntegna in procedere giuridic ed ina collavuraziun cun ils pajais che duain prender enavos requirents. E quai dovra temp.

Cifras actualas

Per la fin da zercladur eran 38 416 (+4%) persunas en la procedura d'asil. 23 384 persunas han ina lubientscha da domicil ad interim. Per 3803 persunas èn las instanzas vidlonder da procurar per ils documents necessaris. Per 1974 persunas vegn organisada la repatriaziun. A 25 415 persunas han las autoritads accordà il dretg d'asil. Tut en tut èn 70 856 persunas involucadas en il sector d'asil. Quei è 2,9% dapli che la stad passada. Ina gronda unda da requirents d'asil ord l'Africa dal nord n'han ins dentant betg constatà fin uss.